



Aqqalu C. Jerimiassen
Atassut

UPA 2024/35 - 2
10. maj 2024

Uunga siunnersuut Aalisarneq pillugu Inatsisartut inatsisaat (Aalisarnermut Piniarnermullu Naalakkersuisoq)

Isumaliutissiissut aallartikkaanni atuarlugu takusassat siullit ilaat ima allaqqavoq: “pisuussutit inuaqatigiit pigisarigaat”.

Oqaaseq tusarneq, ila tusarneqaaq, immaqlumi atuarsimanngikkaanni eqqarsalertoqarsinnaalluni allaat; kiisami nunaqqatitsinnut illersuerpalaarluni saqqummiussaq.

Taamaavippali? Taamaavissimasuungaluarpammi ila immaqa nunatsinni suliffissuit namminersortut annersaat qapiarlugu pineqarnissaa siunertaasimassanngikkaluarpooq.

Allaqqatiliinnarsimajuippaat imak: “pisuussutit pisortat suliffeqarfutaasa pigisarigaat”. Soorlu taanna oqaaseq aallarnitigissallugu assut tulluassasoq, inuaqatigiinnummi illersuisoqqissaajusariaqanngilaq suliffeqarfik pisortat pigisaat illersorlugu pigaanni.

Maluginiarparpullu uagut Atassummi Aalisarnermut Piniarnermut Nunalerinermullu ataatsimiitsitaliami ilaasortaatitaqannginnatta, ataatsimiitsitaliaq arlariinnik susassaqartunik sassartitaqarsimasoq, taakkuli qanoq atorneqarsimatigineri apeqqusernartortaqrlutittaaq. Tassami ataatsimiitsitaliap suna annerusumik nikisingaarsimaneraa imaaliinarlugu takuneqarsinnaanngimmat.

Ulloq 08/05-24 Atassumiit inatsisartut siulittaasoqarfianut allagaqaateqarpugut, Aalisarnermut Piniarnermut Nunalerinermullu ataatsimiitsitaliap pinialuuusaarpallaarnerata kinguneranit isumaliutissiissut piffissakilliornarsereersukkut takkummat. Tuingaarpullu Atassummiittaap 07/05-24 Qanoruumi ataatsimiitsitaliap siulittaasua oqarsinnaammat, kinguaattoorerooq akunnialuminiinnanguanik pimmat akornutaajunnanngitsoq.

Ila ukorsii, tassa taamannak inatsisisanik pingaaruteqartigisunik suliniartarnialersimanerpugut? Aqqutaani malinnaalluarnissamut atuarluarnissamut sussa ilai periarfissillugit?

Paasinarseqqikkiartuliinnaraanngami sooq, Atassummi inatsisartunut ilaasortaq misilittagartooq Siverth K Heilmann oqartuarnersoq, inatsisartunigooq sulineq tukatsikkaluttuinnarpoq. Taannaqami oqartarpoq, ilami tutuuppoq kiisa, uagut partiit minnerit soqtaajunnaavippugut, namminneq ajunngikkunik ajorinngilaat.

Aalisarnermut isumaginninnermullu politik maanna eqqartussaneripput aamma apeqqusingassaq tullinguutilerportaaq.

Pisortammi suliffeqarfutaata immikkut isiginiarneqarnissaanik isummallu mumikkaluarsimaneranik oqaluttuat imaanginnalivimmata ataatsimiitsitaliap siulittaasunit.



Imatullu atagu aamma oqaaseqaateqaqqilaariarta.

Tamatta eqqissilluta piitsooqatigiinnissatsinnik aalisarnermut inatsit aallaaveqassanngilaq, ingerlalluartulli allat ingerlallualersinnaanissaanuttaaq aqqutissiuisussarilernissaanik tunaartaassalluni.

Maannali qanoq inissinniarneqarpamita?

Sorpassuit ukiut ingerlaneranni nalimmassariartuaangassatut taajorneqartut ataatsimiitsitaliamit qanormitaavaana aningaasatigut matussusernissaanimmitta takorluuiffiqeqarsimasut?

Allat pillarlugillu inatsisiliorniarpuguut? Angusarissaarlutik pisimasut namminneerlutik piumassuseqangaarlutik qaqiartuaarsimasut ukiorpassuarni tassa taamannak naalakkersuinikkut eqqaavimmut ingeriutassatut pisarniarsimanerpagut?

Taamaassappat siunissaq pillugu ernumavunga. Nunaqqatit inuussutissariornikkut angusarissaartoq tassa tullaarisuatsianngulerpat illit inatsisartoqat una ilusaatut akueriniarukku.

Qulaaniittut ammut noqqullugit naqqaniittut qaqinniarneqarneq ajorput, tamanna nunarsuup oqaluttuarisaanerani periutsini fiaskuunerpaanikuusoq naluneqanngereerpoq, nunammi taamaaliorsimasut maanna ittorsuarisimasaalluunniit piujuunnaareersimalerpoq iigarsuarli uppimmat. Killumut uagunaasiit kalaallit nunaanni atungarissaarnerunissaq sallitutningilluaasarlugu ingerlalluartut pillaraluttualeqagut.

Sulilu akueriuminaanneruleriartorpoq, ataatsimiitsitaliap siulittaasuata 08/05-24 qanoruukkut oqariartuuteqarnera, taannalu aamma eqqornerlunneqartussaasumik piviusunngitsoq naqissuserneqarmat.

Aasiannigooq aalisakkerivik matussanngilaq, ataatsimiitsitaliap siulittaasua oqariartorpoq, tassanigooq tulaassisussaatitaanerup 30%-imut qaffatsinneqarneratigut aaqqinneaannassammatt.

Oqaatigisalluunniit suli akisuanera aannganngitsoq tamanna suliffeqarfissup pisortaaneranit ilumuunngilluinnartoq nassuiarneqaratarpoq. Taamaammat Atassummiit kaammattutigissuarput, ila paasisstissanik eqqoriaaginnarata avammut qaputtaqinata!

Kitaani raajarniarnermi ataatsimiitsitaliap siulittaasua qanoruukkut oqariartorpoq naaperiuteqarsimalluni, naaperiutigisimasaalu imatut taaneqarsinnaavoq, namminersortoq ajorseriarteriarlugu aamma RG ajoqataanik inissillugu. Naamingaa pitsaaqatigiimmik aaliangersaaniarsarivoq, tupiginngilaralu illuatungiliuttut ikinnerussuteqartut tamanna naaperiaanermik kusassarlugu taasaq qunoriarfigisimammassuk.

Asuliinnanngilaq taamaattumik maanna Atassummi oqaaseq atortagarput; tamatta eqqissilluta ajoqatigiissuugut, tamatta piitsooqatigiissuugut. Tassami taamatut kitaani raajarniarneq pillugu aaqqiissuteqarnissaminut naaperiutigisimasaat oqaasertalissallugu tulluarnerusinnaagunannngilaq.

33,33%-imulli uterteqqinneaqarsimasoq isumaliuutissiissummi takuneqarsinnaavoq, aammalu immikkut pineqarnissaa taakkartorneqarluni, oqaaserlu ataaseq tassani maluginiangarput Atassummiit tassaavortaaq, RG-gooq isumaginninnikkuttaaq pisussaafflersugaammat.



Ila tassa imaannerpa, aalisarnermut inatsisissaq isumaginninnermut politikkinngoriasaartoq?

Aammami siullermeerneqarneranili oqariartuitigisimasagut arlallit annisereerpagut.

Qaleralinniarnermut saassagaanni, aqutsiveqarfik 47-imí PNNP toqqammavimmigut ajunngilluinnarsinnaasoq ataassummiit isumaqarpugut.

Aarleqquataasinnaasorli ataaseq tassaatipparput, maanna paggatassiilluni aalisartitsarnermi pisassiissutaasartut annertussuserisaat qanoq nikisitsigineqarumaarnersoq piffissami aggersumi. Tassami nikisinneqaratarsinnaanerannut aarleqquataasut ilaatigut nunatta avannaani kingunerluutaasinnaasut ataasialianngitsumik qaqpinqeqartareermata.

Minnerunngitsumillu tusarniaanermi oqariartuutaasarsimasut qarsupipajaaginnarneqarsimammata.

PNNP-mut nuutsitsereernermi uumasorsiuut innersuussutaannut nuutitsiartuaarnissamik ingerlataqassagaanni qanoq aningaasatigut inuiaqatigut aningaasarsiornerannut kinguneqarnissaa naalakkersuisut tamanut takusassanngorlugu nassuiaqqaartariaqarparput.

Toqqammaviatigulluunniit akuersaaraluarutta PNNP-nut assilissap pitsaasortaannaa isiginiarsinnaanngilarput, tamaat erseqqissumik qulaaqqaartariaqarparput.

Siuliani naammattumik Atassummiit oqaaseqaateqareernikuusutut misigingatta, maanna aappassaaneerneqarnerani allannguutissatut siunnersuutiminaarsuit eqqaassanngikkaanni ataatsimiitsitaliaq annerusumik nikisitsisimanngimmat tapersiisinnaanerput suli ungasippoq.

Pingajussaaneerneqannginnerminilu neriuutigingaarpalput naaperiaasuusaarnerit atorunnaalaarlugit avammullu eqqortumik oqaluttoqarnissaa kaammattutigaarpalput.